

# I Panguligan lan Basa Genep



# I PANGULIGAN LAN BASA GENEP

I Putu Ardiles Pande Tonjaya

Balai Bahasa Provinsi Bali

2022





# I PANGULIGAN LAN BASA GENEP

Pangawi  
I Putu Ardiles Pande Tonjaya

Panyeleh  
I Nyoman Sutrisna

Juru Gambar  
I Wayan Suryana

Panerbit  
Kementerian Pendidikan, Kebudayaan, Riset, dan Teknologi

Cetakan Kapertama  
November 2022  
28 hlm: 21 cm x 14,8 cm

ISBN .....

## PURWANING ATUR

Rahayu, puja pangastiti aturang titiang majeng ring Ida Sang Hyang Widhi Wasa santukan sangkaning asung kertha wara nugrahan Ida buku puniki prasida kamijilang tur mangkin sampun prasida kawacén olih ida dané makasami. Puniki wantah usaha Balai Bahasa Provinsi Bali nagingin kawéntenan buku-buku sané kaanggén *bahan bacaan literasi* ring para janané, utamanyané ring jagat pendidikan. Ngwéntenang *bahan bacaan literasi* sakadi satua mawiguna pisan anggén nincapang arsa ngwacén ring alit-alité miwah anggén numbuhang budi pekerti. Pinaka bahan utama anggén numbuhang karakter becik miwah pikayunan ngwacén ring alit-alite patut kaupapira saking anom, punika kakawitin saking kulawarga, sekolah, kantos ring para janané. Pakarsan ngwacén sané akéh ring para janané, kasokong antuk kawéntenan *bahan bacaan* sané becik miwah dangan kapolihang, pacang nincapang budaya ngwacén miwah nulis, inggih punika ring sekolah rauh ring para janané.

Salanturnyané, buku puniki prasida mawiguna pinaka silih tunggil sarana utawi *media pendidikan karakter*. Karaosang asapunika sawiréh kawéntenan carita punika akéh madué nilai-nilai adiluhung sané prasida ngemban *fungsi praktis*, inggih punika ngwangun *karakter* sang sané ngwacén. *Karakter* sané kawangun wantah *karakter religiositas, nasionalisme, kemandirian, gotong royong*, miwah *integritas*. Tiosan ring punika, carita ring buku-buku puniki kaaptiang prasida ngwangun *imajinasi miwah kompetensi berpikir kritis*, prasida numbuhang *kreativitas* miwah kaweruhan ring *komunikasi* kénten taler *kolaborasi* pinaka prasyarat ngamargiang kauripan ring abad 21.

Buku puniki kamedalang pinaka jayanti saking acara *Sayembara Penyusunan Bahan Bacaan Siswa SD Kelas Awal (1, 2, dan 3)*. Wenten nem buku carita mabasa Bali sane kamedalang, inggih punika (1) Pajalan I Cérry, (2) I Panguligan lan Basa Genep, (3) I Suta Maotonan, (4) Kédep Ngalap Gatép, (5) Dagang Loloh Kalolohin, lan (6) Asih Tekéning Beburon. Santukan punika titiang ngaturang paramaning suksma majeng ring pangawi makasami sané sampun prasida ngawi buku puniki. Mogi buku puniki prasida mawiguna pinaka jalaran numbuhang budaya *literasi* miwah ngaturang aji kaweruhan ring para janané nyujur *insan* Indonésia sané wikan, wicaksana, miwah madué budi pekerti luhur.

Dénpasar, November 2022  
Manggala Balai Bahasa Provinsi Bali

Dr. Herawati, S.S., M.A.



## Pangaksama

Om Swastiastu,

Angayubagia aturang titiang majeng ring Ida Sang Hyang Widhi Wasa, sangkaning antuk pasuécan Ida, titiang prasida muputang buku cerita raré mabasa Bali puniki sané majudul “I Panguligan lan Basa Genep”. Buku sané karyanin titiang puniki matetujon antuk nyarengin “Sayembara Penulisan Bahan Bacaan Siswa SD Kelas Awal (1,2, dan 3) Berbahasa Bali Tahun 2022. Titiang nénten lali matur suksma majeng ring sané ngwantu antuk pamuputan buku ceritané puniki, majeng ring:

1. Balai Bahasa Bali sané ngelarang acarané puniki,
2. I Wayan Suryana, sané dados illustrator ngaryanin gambar ring buku cerita puniki,
3. Keluarga titiang sami sané mendukung titiang antuk nyarengin acarané puniki.

Buku puniki nyeritayang antuk I Panguligan sané polih tugas ngaryanin basa genep kaanggé ajeng-ajengan sareng timpal-timpalnyané sakancan soroh lakar basa, I Bawang, I Kesuna, I Kunyit, I Mica, I Jaé, I Tingkih, I Tabia, lan I Cekuh. Solahnyané I Tabia, I Mica, lan I Jaé sané bengkung lan nyapa kadi aku, marasa déwék sané paling luwung ngrananyang rasa basa genep sané kakaryanin kaliwat lalah lan pengah. Cerita puniki ngajahin alit-alité mangda adung menyama braya, masawitra, utawi ring kulawarga mangda napi sané kakaryanin lan aptiang molihang hasil sané becik. Titiang taler ngacep mangda buku puniki maguna antuk pangwaca lan sida ngwangun rasa raket masawitra ring soang-soang pangwaca. Pinih unkur, titiang nunas piteket antuk buku puniki mangda prasida ngamecikang.

Om Santhi, Santhi, Santhi, Om.

Salam,  
I Putu Ardiles Pande Tonjaya


# DAGING CAKEPAN

Pruwaning Atur.....	iii
Atur Pangaksama .....	iv
Daging Cakepan.....	v
Daging Carita .....	1—21
Pangawi lan Ilustrator .....	22



Buku puniki duén :


.....  
.....  
.....






Ada katuturan satua I Panguligan.  
Ia ngelah geginan ngaé soroh basa anggo nyakan.  
Basané ento lakar anggonna masain soroh lelebengan.





Sedek dina anu, I Penguligan maan gaé.  
Ia tundéna ngaé basa genep.  
Basa ento lakar anggona ngaé betutu.




I Panguligan munduhang timpal-timpalné soroh lakar basa.  
Ada I Bawang, I Kesuna, I Kunyit, I Mica, I Jaé, I Tingkih, I Tabia,  
tur I Cekuh.




Ia laut ngawit ngratus lakar basa ento anggona ngaé betutu.  
Kapertama I Panguligan ngorahin I Bawang lan I Kesuna apang  
nyelepang limang badih bawang lan kesuna.






Kalanturang baan I Kunyt, I Cekuh, lan I Jaé ané suba sayaga di  
arep I Panguligan.  
I Panguligan ngorahin apang nyelepang kunyt, cekuh, miwah  
jaé pada acengkang.  
Tetujonné apang ngenepin soroh bebungkilané.




Suba lantas kéto, jani gatiné I Tingkih.  
I Panguligan ngorahin I Tingkih nyelepang tingkih telung  
bulih apang bé betutuné nyak luung gebuhné.



Paling si duri, gantiné I Tabia lan I Mica ané  
nyelepang sorohnyané  
I Panguligan ngidih apang I Tabia nyelepang tabia  
telung bulih.



Nanging, I Tabia tusing nyak nuutin I Panguligan.  
I Tabia marasa lalahné ané paling demenina tekén  
manusané.  
Ia dot apang tabiané liunan.




Keto masih I Mica milu uyut.  
Yéning I Tabia kadadiang ané utama, I Mica dot  
masih ngimbuhin mica apang patuh ajak I Tabia.






I Jaé ané suba santep nyele pang soroh lakar basané nadaksara teka sambilanga uyut.  
Ia dot apang nyidang masih ngimbuhin.  
Ia marasa basané lakar sayan nyantep tur anget yén liu imbuhin jaé.




I Panguligan lantás natasang tekén soroh bebasané,  
yén lakar ngaé basa genep, sapatutné basa-basané  
ento suba pada adung.

Yén basané liunan tekén lakar basa ané suba  
katakehang, sinah rasané lakar usak.



Sakéwala I Tabia, I Mica, lan I Jaé kukuh tusing nyak ngugu.  
Ia mamengkung ngorahang tuah kenehné ento ané paling lungu.



Marasa pocol majogjag, I Panguligan lantasi nuutin  
kenéh timpalné ento.

I Panguligan ngidih apang I Tabia, I Mica, lan I Jaé  
mastikayang bé betutu ento pastika jaen.





Sasubané makejang lakar basané suba kaulig, basa genep ento suba sayaga anggo ngaé betutu.

I Manusa kendel pesan sawiréh ia lakar naar betutu. Suba lantasi kéto, betutuné kalebengang.




Sasubané lebeg, I Manusa lantas naar betutu ento.  
Nanging, ia marasa betutu ento bes lalah tur pengah sajan.

I Manusa tusing jaen makinyukan.



I Panguligan tur soroh bebasané nepukiné unduké ento. Makejang lantas nolih I Tabia, I Mica, lan I Jaé. Soroh bebasané ané lénan makejang melihang ia ajaka tetelu unduk rasan betutuné.



I Tabia, I Mica, lan I Jaé maselselan unduk solahné.  
Ia majanji tusing lakar buin malaksana buka kéto tur  
sadia nuutin raosné I Panguligan.





Sasukat ento, reraturan lakar basané adung sajan ajak soroh  
bebasané makejang.  
Pamuputné, makejang lakar basa ané karatus setata  
kademenin tekén I Manusa.



## INDIK PANGAWI

I Putu Ardiles Pande Tonjaya embas ring Péréan, 27 Maret 1989. Pakaryan dané dados karyawan swasta ring perhotélan wit saking 2010 nyantos mangkin. Dané seneng musik, magitaran, utawi ngaryanin gegendingan mabasa Bali.











## BIODATA ILLUSTRATOR

I Wayan Suryana embas ring Tabanan, 25 Januari 1984. Dané nelebang widang desain grafis tur madué usaha ngambar kuaca anggén *clothing*, desain lambang usaha ajeng-ajengan, produkdupa, taler gegambaran anggén ring buku.

Akun media sosial instagram: suryanaart.

Cocok gambar betén ené nganggon garis





I Bawang

I Panguligan

I Mica

I Kesuna

I Tabia

I Kunyit

I Jaé

I Cekuh

I Tingkih